



Glygge-Zyttig vo de  
**JOKER WAGGIS**

Usgoob 13 - im Hoornig 2018



### Unter der Lupe

Der Gwäggi

SYTTE 2



### Esoo gseen Gwinner us

SYTTE 2



### Basler Fasnacht 2018

S'Programm stoot

SYTTE 3



# Ruggblig Fasnacht 2017: Wenn s'Wätter am Änd doch nääbesächlich wird

Gruusig! Das beschriibt wool am beschte s'Wätter vom Fasnachts-Mäntig 2017. S'ainzig positive an däm Daag isch gsi, dass es numme aimol grääget het ... laider isch das vo Aafang Cortège bis zoobe

sboot in d'Nacht der Fall gsi. Zum Glügg hän der Fasnachts-Zyschtig und -Mittwuch denn no fir ainiges entschädigt. Esoo isch unseri Jubiläums-Fasnacht nit komplett ins Wasser gfalle.



Doo isch d'Wält no in Oornig gsi: Grupfefotti am Wettstaiplatz kurz vor em groomsse Rääge

Dass es am Fasnachts-Mäntig räägne wird, het me scho in der Wuche vor der Fasnacht in der Wätter-Vorschau kenne gsee. Dass es aber pauselos syy wurd, het me doch nit grad erwartet.

Denn aagfange het's nit emol esoo schlächt, isch der Mäntig-Moorge doch wytgehend drogge gsi. Aber pinggtlig um 13:30 Uhr und em Start vom Cortège sinn d'Schleuse uff gange. Speeteschtens jetz isch de JOKER WAGGIS bewusst worde, dass e offene Waage in däm Joor nit unbedingt ideal gsi isch.

Doch kuum uff der Route, isch s'schlächte Wätter rasch vergässe gsi. Denn unter der Laarve isch me perfäggt vor Nässi gschitzt. S'ganze Usmass isch drum erscht bim erschte Halt am Claraplatz zem Vorschynn koo.

Doch luege mer nomol e bitz wyter zrug in d'Zyt vor der Fasnacht. Deert, wo me sich fir s'Sujet "Syt 20 Joor am Cortège deheim" entscheide het und derfir, e Waage ooni Dach

z'baue.

D'Ydee isch urspringlig doo druss entstande, dass me vo iiberall freyi Sicht sell ha uff s'Woonzimmer, wo me im Waage-Innere baut het. Und aigentlich wär dää Plan uffgange, sogar im Färnsee isch usfierlig driiber brichtet worde - wär doo nit wiider der Rääge gsi ...

Wiider zrug am Cortège am Mäntig-Nomidaag. Uff em Waage isch nach em erschte Viertel vo der Route scho e riise Moorerei gsi. Wo me aaneglängt het, isch es nass

gsi. Und zämme mit de Rääpli isch druss e richtige Brei entstande. Und au d'Laarve hän glitte, zuedäm sinn d'Bascht-Hoor ungläublig schwäärr worde.



E offene Waage, Rääge und Rääpli ... e riise Moorerei ...

S'beschte isch also gsi, d'Pause esoo kurz wie meeglig z'halte. Me het jo

immerhii kenne hoffe, dass s'Wätter an de kommende Dääg e weeneli

WYTER SYTTE 2

## FORTSETZIG

frindlicher syy kennt ...

Daatsächlich het sich der Fasnachts-Zyschtig als wääsentlig erfreulicher uusegestellt. Und sogar d'Sunne het ab und zue hinter de Wolgge fiire gluegt.

Logisch sinn d'JOKER WAGGIS und e Hampfle Binggis hoch motiviert duur d'Stadt zooge.

Am Oobe het s'Binggis-Wäägeli denn em Bar-Wäägeli miesse Platz mache. Und esoo isch me no bis wyt nach Mitternacht um d'Hiiser zooge ...

Im Vergliich zum Vordaag, het der Fasnachts-Mittwuch nit ganz kenne mithalte was s'Wätter aagoot. Aber geegenüber em Fasnachts-Mäntig isch es scho fascht draumhaft gsi. Esoo isch es pinggtlig um 13:30 Uhr

*"Wagen müssen unbedingt auf der rechten Strassenseite so parkiert werden, dass nachfolgende Fasnächtlerinnen und Fasnächtler ungehindert passieren können."*



JOKER WAGGIS leen sich d'Stimmig nit verdäärbe

loos gange vom Wettstaipplatz iiber d'Wettstaibrugg richtig Grossbasel. Bim Kunschtmuseum isch denn bereits die erschti Pause aagsait gsi - nit will me nimme het meege, sondern will s'Comité das verlangt. Drum isch me uff der Heechi vo der Credit Suisse rächts aane gfaare. Nonig rächt gstande, isch der Ywywyser ko springe und het deubelet, me wurd der Cortège uffhalte.

Zuedäm sig der Pauseplatz deert uff der lingge Sytte. Obwool d'Comité-Verkeersoornig ebbis anders sait (vergl. Box), het sich dää Gloon nit beirre loo. Will de JOKER WAGGIS die Diskussion z'bleed gsi isch, het me d'Pause spontan abbroche und in d'Strigtass verschoobe. Hintedrii het me denn no erfaare, dass me sanggziooniert wird wäge däm lachhafte Vorfall.

Aber weder s'Wätter, no e Ywywyser im Greessewaan hän's gschaft, de JOKER WAGGIS iiri Jubiläums-Fasnacht z'versaue ...

## Esoo gseen Gwinner us

In der ainte oder andere Usgoob vom 72stunde het's gläägentlig e Wettbewäärb gää, wo me het kenne e aggtuelli Fasnachts-Blaggedde, Baseball-Caps, oder - so gschee in der Usgoob 12 - e Gedrängge-Guetschyyen fir unseri JOKER BAR an der Muttenzer Fasnacht 2018 gwinne. Wär doo nit mitmacht, isch nadyrlig sälber schuld ...



Das het sich au der Ruben dänggt! Und d'Froog, zem wievyylte Mol der Garage-Bar-Oobe vo de JOKER WAGGIS am 29. Septämber 2017 stattgfunde het, het iin nit erzittere loo. Denn als Gascht an däm Oobe, het er nadyrlig uff Aahiib gwisst, dass es s'erschte Mol gsi isch. Härzlige Gliggwunsch, Ruben!

## Unter der Lupe: Der Gwäggi

In dääre Rubrigg wird allewyyl ai JOKER genauer voorgestellt. Diesmol nämme miir der Gwäggi - unsere Draggdoor-Faarer - unter d'Lupe.

**72stunde: Wie alt bisch Du?**

Gwäggi: Ich bi 59.

**72stunde: Wo bisch Du dihaim?**

Gwäggi: In Himmelried.

**72stunde: Was machsch brueflig?**

Gwäggi: Ich bi LKW-Chauffeur - mit grosse Faarziig kenn ich mii also beschstens us. Im Momänt bi ich allerdings uff Stelle-Suechi.

**72stunde: Was machsch Du in Diiner Freizyt?**

Gwäggi: Ich gang ainige Hobbys noch. Doo derzue gheert sicher au e weeneli "game". Aber au baschtle due ich gärn, am liebschte mit Holz. Wurd au gärn wiider go Deffaare - laider liigt das zur Zyt nit dinne. Und nadyrlig verbring ich so vyyl Zyt wie meeglig mit mim Schatz - der Manuela.



**72stunde: Syt wenn bisch Du als Faarer bi de JOKER WAGGIS?**

Gwäggi: S'allerersch Mol bi ich an

der Fasnacht 2014 fir d'JOKER WAGGIS gfaare.

**72stunde: Wie bisch Du denn zue dääre Uffgoob koo?**

Gwäggi: Duur mii Tochter. Sii isch d'Frau vom Busi - em Oobmaa vo de JOKER WAGGIS.

Wo ich vor der Fasnacht 2014 gheert ha, dass sii e neue Faarer sueche, ha ich spontan zuegsait.

**72stunde: Weeles isch Dii bishär scheenschts Erläbnis mit de JOKER WAGGIS?**

Gwäggi: Das ka ich gar nit so genau saage. Es isch allewyyl wiider scheen und speziell mit de Jungs vo de JOKER WAGGIS.

**72stunde: Wirsch Du d'JOKER WAGGIS au zuekinftig duur e Cortège längge?**

Gwäggi: Das wurd ich nadyrlig seer gärn, sofärn mii Gsundhait das wyterhii zuelost. Schliesslig macht's Spass und us der Kabine vom Draggdoor het me der bescht Bligg uff e Cortège.

# Vorschau Basler Fasnacht 2018 - s'Programm vo de JOKER WAGGIS

Au in dääre Usgoob vom **72stunde** git's wiider unsere Fasnachts-Fierer. Uff d'Fasnacht 2018 het's nomol die aint oder ander Veränderig gää. Nach de Schwiirigkaite mit de Pauseplätz im 2017, hän miir deert miesse Aapassige vornää. Und au am Fasnachts-Zyschtig isch mänggs neu. Aber dangg em Routeplann hän unseri Familie, Frinde, Fans oder Passiv-Mitglieder sicher d'Meegligkait, uns JOKER WAGGIS irgendwo live z'erlääbe ...

## Fasnachts-Mäntig

**13:30 Uhr**

Start am Wettstaiplatz (1)

**14:30 Uhr**

1. Pause am Claraplatz (2)

**15:00 Uhr**

Wyter goot s ...

**16:00 Uhr**

2. Pause in der Staine (3)

**16:30 Uhr**

Wyter goot s ...

**17:00 Uhr**

3. Pause bim Banggverain (4)

**17:30 Uhr**

Wyter goot s ...

**18:00 Uhr**

Waageleere am Wettstaiplatz (1)

**19:00 Uhr**

Waage versoorge

**23:00 Uhr**

d'JOKER WAGGIS uff der Gass



## Fasnachts-Zyschtig

**14:30 Uhr**

Start am Barfi (Stadtcasino)

**18:00 Uhr**

Ustusch Binggis- / Bar-Wägeli

**18:30 Uhr**

Nachtässe in der Clarastroos

**21:00 Uhr**

Birsig-Sinfonie bi der Draischibe

**23:30 Uhr**

d'JOKER WAGGIS uff der Gass

## Fasnachts-Mittwuch

**13:30 Uhr**

Start am Wettstaiplatz (5)

**14:15 Uhr**

1. Pause in der Stritgass (6)

**14:45 Uhr**

Wyter goot s ...

**16:00 Uhr**

2. Pause in der Utegass (7)

**16:30 Uhr**

Wyter goot s ...

**17:15 Uhr**

3. Pause bi der Mäss (8)

**17:45 Uhr**

Wyter goot s ...

**18:00 Uhr**

Waageleere am Wettstaiplatz (5)

**19:00 Uhr**

Waage versoorge

**23:00 Uhr**

d'JOKER WAGGIS uff der Gass

**04:00 Uhr**

d'JOKER WAGGIS am Ändstraich



Guetschhyn

Geege Abgoob vo däm Guetschhyn an unserer JOKER BAR an der Mutterzer Fasnacht 2018 griegsch Du e Willkommens-Dringg gratis!

Name: \_\_\_\_\_

